

續唐書

卷二十八至卷三十五

世家下
晉 楚 吳 越 閩 南平

后妃傳上

續唐書卷二十八

海昌陳鱣撰

武林姜安
長水祝恂
全校

楚世家第七

馬殷字霸圖許州鄆陵人也少為木工中和三年蔡州秦宗權作亂始應募從軍初隨孫儒渡淮陷廣陵及儒敗於宣州殷隨別將劉建鋒過江西連陷洪鄂潭桂等州建鋒盡有湖南之地乾寧元年僖宗授建鋒湖南節度使殷為馬步軍都指揮使建鋒庸人不能帥其下常與部曲飲酒灌呼軍卒陳贍妻有色建鋒私之贍怒以鐵槌擊殺建鋒軍中推行軍司馬張佶為帥佶將入府馬忽蹠齧傷髀是

續唐書卷二十八
時殷攻邵州未歸信語諸將曰馬公英勇吾所不及真乃主也諸將乃共殺贍迎殷於邵州殷至信肩輿入府命殷升聽事以留後讓之卽趨下率將吏拜賀時乾寧三年夏五月也秋九月昭宗授殷潭州刺史判湖南軍府光化元年春三月命殷知武安留後未幾進本軍節度使遂有潭衡七州之地天復二年春三月昭宗使李儼宣諭江淮加殷同平章事天復三年夏四月楊行密遣使來言朱全忠跋扈請絕之大將許德勳曰全忠雖不道然挾天子以令諸侯未可輕絕五月荆南節度使成汭赴援鄂州殷假救杜洪之名遣德勳將舟師同澧朗兵承虛襲江陵大掠而

還天祐四年朱全忠篡位僞改元開平殷遣使修貢夏四月辛未全忠拜殷侍中兼中書令封楚王天祐七年僞開平四年夏六月殷上章請依太宗故事乃加天策上將軍之號又請官位內添制置靜江武平寧遠等軍事皆從之旣封楚王仍請依唐諸王行臺故事置諸天官幕府有文苑學士之號知詔令之名總制二十餘州自署官吏征賦不供民間採茶並抑而買之天祐八年僞乾化元年鑄天策錢文曰天策府寶銅質渾厚徑寸七分重三十銖二參天祐二十年莊宗卽皇帝位遂滅梁改元同光殷遣子希範修貢京師上梁所授洪鄂行營都統印莊宗問洞庭廣

狹希範對曰車駕南巡纔堪飲馬爾莊宗嘉之是歲避唐廟諱改岳州昌江縣曰平江同光二年夏四月乙亥勅加殷兼尙書令楚王同光三年冬十一月莊宗平蜀殷大懼表求致仕莊宗璽書慰勞優詔不許是時關市無征商旅輻輳地故產鉛鐵乃鑄鉛錢以十當銅錢一又鑄鐵錢圍六寸文曰乾封泉寶用九文爲貫以一當十流行境內凡天下商賈齎寶貨至者祇以鉛鐵博易之無餘遂致一方富盛窮極奢侈貢奉朝廷不過茶數萬斤而已於中原賣茶之利歲百萬計又湖南不事蠶桑殷令輸稅者以帛代錢由是機杼大盛同光四年莊宗崩明宗卽位改元天成

殷遣使人貢稱賀勅加殷守尙書令天成二年夏六月請建行臺丙申明宗封殷楚國王有司言無封國王禮請如三公用竹冊乃遣尙書右丞持節以竹冊封之殷以潭州爲長沙府建國承制自置官屬分天子之半仗焉天成四年秋八月勅中書門下凡署將相勅牒宜落吳越王鏐及楚王殷官位長興元年冬十一月己巳殷薨於位年七十九詔曰馬殷官爵俱高無以爲贈可謚曰武穆葬衡陽之上潢子希聲立

希聲字若訥殷次子也長興元年冬十一月丙戌襲位稱遣命去建國之制復藩鎮之舊十二月勅進希聲爲武安

靜江等軍節度使加兼中書令希聲居喪無戚容聞朱全忠好食雞慕之乃日烹五十雞以供膳長興二年葬殷衡陽希聲不入泣頓食雞肉數器而起其禮部侍郎潘起譏之曰昔阮籍居喪食蒸豚世故不乏賢者長興三年秋七月辛卯希聲薨追封衡陽王弟希範立

希範字寶規殷第四子也長興三年秋八月辛酉襲位九月勅希範爲武安軍節度使兼侍中冬十月癸酉進貢銀茶請頒戰馬明宗賜馬五十匹歸貢物應順元年春正月壬辰閔帝封希範爲楚王清泰二年末帝賜希範弓矢冠劔清泰三年冬十一月契丹立石敬瑭僞號晉改元天福

是時命修黃陵廟致祭昇元元年烈祖卽位僞天福二年晉加希範江南諸道都統制置武平靜江等軍事改賜功臣號增食邑有差昇元二年僞天福四年夏四月晉加希範天策上將軍開府置官如殷故事希範好學善詩文倣太宗天策府文學館立學士員以廖光圖徐仲雅李皋拓拔常等十八人充之是月劉勅等進攻溪州彭士然兵敗棄州走保山寨石崖四絕勅爲棧梯上圍之廖匡齊戰死昇元四年僞天福五年春正月劉勅進攻彭士然寨火箭焚之士然率麾下逃入溪錦深山遣其子師曷率諸蠻納溪錦龍三州印請降二月勅班師還長沙希範徙溪州於

便地表土然爲溪州刺史勅爲錦州刺史溪州西接牂牁
兩林南通桂林象郡希範素稱漢馬援裔效伏波將軍故
事乃立銅柱爲表命學士李皋銘之勒誓狀於上自是南
寧州酋長莫彥殊率其本部十八州都雲酋長尹懷昌率
其昆明等十一部牂牁蠻張萬濬率其夷播等七州皆先
後來附昇元六年僞天福七年冬十月希範大興土木建
天策府其費鉅萬始加賦於國拓拔常切諫以爲不可昇
元七年僞天福八年希範又作九龍殿以八龍繞柱自言
身一龍也自時厥後契丹滅晉中國大亂希範耗國用而
窮土木牙將丁思觀切諫不聽思觀扼喉而死保大四年

夏五月壬辰希範薨年四十九謚曰文昭弟希廣立

希廣字德丕希範同母弟也希範平生惡拓拔常諫諍堂
人謁希範呼闈者曰吾不欲見此人乃謝絕之及臥病始
思常言以爲忠召之託以希廣希範卒常數勸希廣以位
奉其兄希萼希廣不從保大四年夏六月契丹立劉知遠
爲帝僞號漢仍以天福紀年遣使告諭秋七月漢以希廣
爲天策上將軍武安軍節度使江南諸道都統兼中書令
封楚王保大五年僞天福十二年冬十月希萼自朗州來
奔喪至硤石希廣用其將劉彥瑫言遣迎希萼命將士釋
甲而後入止之於碧湘宮厚賂以遣之希萼憤然而去乃

遣使詣漢求封爵請置邸稱藩劉承祐不許希萼怒送欵於唐元宗舉兵攻長沙希廣遣劉彥瑫等禦之於僕射洲敗之希萼去誘溪洞蠻寇益陽希廣遣崔璉洪以步卒七千屯湘鄉玉潭以遏諸蠻彥瑫以舟兵趨武陵攻希萼彥瑫敗於澗洲希廣大懼遣使請兵於漢承祐不能出師希萼率舟師沿江而上自稱順天王攻岳州刺史王贇堅城不戰希萼責其有貳心贇曰願君王入長沙不傷同氣臣其敢不盡節希萼引兵去辛卯經湘陰至長沙屯於水西劉彥瑫許可瓊屯水東彭師曷登城望水西軍入白希廣請與可瓊水陸夾擊之希廣許諾而可瓊已陰送欵於希

萼遂沮其議明日師曷叱可瓊欲反急白希廣請殺之不聽希萼攻長樂門牙將吳宏楊滌聞之皆潰長沙遂陷希廣率妻子匿於慈堂明日擒之希萼見而惻然曰此鈍夫也豈能爲惡徒爲左右惑之爾顧其下曰吾欲活之何如其下皆不對遂縊殺之師曷葬之瀏陽門外希萼自立希萼殷之庶子也剛很無禮而其同母弟希崇尤狡險希廣襲位時希崇爲天策左司馬陰遺書希萼言劉彥瑫等違先王命廢長立少意欲以激亂也希萼果興師爭國及長沙已陷希崇復從與推戴希萼遂自稱楚王以希崇爲節度副使判軍府事湖南要職悉以朗人爲之時保大八

年冬十一月丁未也保大九年春正月甲辰希萼遣掌書
記劉光輔入貢二月元宗以希萼爲天策上將軍武安等
軍節度使兼中書令封楚王是月光輔至金陵元宗待之
甚厚光輔密言湖南民疲主驕可取也元宗乃以營屯都
虞侯邊鎬爲信州刺史將兵屯袁州潛謀侵邊希萼旣得
志縱酒荒淫悉以軍府事委希崇希崇與楚舊將徐威等
謀作亂秋九月戊寅希萼置酒端陽門希崇辭以疾威等
縱惡馬十餘匹以壯士執槓隨之突入其府劫庫兵縛希
萼迎希崇以立希崇遣彭師曷囚希萼於衡山希崇旣襲
位亦縱酒荒淫國人不附丙戌師曷等奉希萼爲衡山王

召募徒衆遣判官劉虛己求救於金陵徐威等見希崇所
爲必敗又畏朗州衡山之逼欲殺希崇以自解希崇覺之
大懼密遣人表請兵於金陵元宗命邊鎬自袁州將兵萬
人趣長沙冬十月辛卯鎬引兵入醴陵癸巳希崇遣使犒
軍壬寅遣天策學士拓拔常奉牋詣鎬降是月邊鎬趣希
崇率其族入朝遂遷馬氏之族於金陵十一月辛未遣使
如衡山趣希萼入朝元宗以希萼爲江南道觀察使守中
書令鎮洪州仍賜爵楚王以希崇爲永泰軍節度使兼侍
中鎮舒州仍居揚州保大十年冬十月希萼入覲元宗留
之數年薨於金陵謚曰恭孝其後希崇奔周爲右羽林統

軍

述曰殷之開國也自以為伏波之後獨不念伏波之戒子弟願其效龍伯高之謙約節儉乃不務令德克家無人驕泰成風怙侈滅義卒也潰敗決裂率族歸降哀哉

續唐書卷二十八終

續唐書卷二十九

海昌陳鱣誤

武林姜安長水祝恂全校

吳越世家第八

錢鏐字具美杭州臨安人也父寬生鏐之夕方他適鄰人急奔告曰君家後舍聞甲馬聲甚眾寬疾馳歸而鏐已生復有紅光滿室怪之將棄於邱氏之井其大母知非常人固不許因小字曰婆留而井亦以名里中有大木鏐幼時與羣兒戲木下坐大石指麾羣兒為隊伍號令頗有法羣兒皆憚之及壯無賴不事生業以販鹽為盜縣錄事鍾起有子數與鏐飲博起常禁其諸子諸子多竊從之遊豫章

人有善術者望斗牛間有王氣錢唐分也因遊錢唐占之在臨安乃之臨安以相法隱市中陰求其人起與術者善私謂起曰占君縣有貴人求之市中不得視君相貴矣然不足當之起乃置酒悉召縣中賢豪徧視之皆不足當一日術者過起家鏐適從外來見起反走術者望見之大驚曰此真貴人也起笑曰此吾苟舍錢生耳術者召鏐至熟視之顧起曰君之貴者因此人也乃慰鏐曰子骨法非常顧自愛遂與起訣曰吾求其人者非有所欲直欲質吾術爾乃去起始縱其子與鏐遊時時貸其窮乏鏐善射與槊稍通圖緯諸書乾符二年浙西鎮遏王郢作亂石鏡鎮將

董昌募鄉兵討賊表鏐偏將擊郢破之是時黃巢衆已數千攻掠浙東至臨安鏐曰今鎮兵少而賊兵多難以力禦宜出奇兵邀之乃與勁卒二十人伏山谷中巢先鋒度險皆單騎鏐伏弩射殺其將巢兵亂鏐引勁卒蹂之斬其首數百級鏐曰此可一用耳若大衆至何可敵耶乃引兵趨八百里八百里地名也告道旁媪曰後有問者告曰臨安兵屯八百里矣巢衆至聞媪語不知其地名皆曰嚮十餘卒不可敵況八百里乎遂急引兵退都統高駢聞巢不敢犯臨安壯之召董昌與鏐俱至廣陵久之駢無討賊意昌等不見用辭還駢遂表昌爲杭州刺史先是天下已亂廣

續唐書卷二十九
明元年杭州始有八都餘杭陳晟於潛吳文舉鹽官徐及
新登杜稜唐山饒景富春文禹龍泉凌文舉各聚數千人
以衛鄉里而臨安則爲董昌而鏐副焉至此昌乃團練八
都兵以鏐統之中和二年秋七月浙東觀察使劉漢宏與
昌有隙遣弟漢宥都虞侯辛約屯兵西陵鏐率八都兵渡
江竊敵軍號斫其營營中驚擾因焚之漢宥等皆走漢宏
復遣將黃珪何蕭屯諸暨蕭山鏐皆攻破之與漢宏遇戰
大敗之殺何蕭辛約漢宏易服持膽刀以遜追者及之誑
曰我宰夫也舉刀以示乃免中和四年僖宗遣中使焦居
璠爲杭越通和使詔昌與漢宏罷兵皆不奉詔漢宏遣其

將朱褒韓公玖施堅實等以舟師屯望海成及夜率奇兵
破褒等於曹娥埭進屯豐山施堅實等遂攻破越州漢宏
走台州台州刺史執漢宏送於鏐斬於會稽族其家鏐乃
奏昌代漢宏而自居杭州光啓二年拜鏐左衛大將軍杭
州刺史昌越州觀察使景福元年孫儒楊行密交亂淮海
煙塵數千里鏐常率師以爲防禦孫儒據宣州不敢侵江
浙由是鏐勳名日著景福二年以鎮海軍節度使仍移潤
州軍額於杭州爲治所又立威勝軍於越州董昌爲節度
使昌漸驕貴自言身應符讖又爲妖人王百藝所誑僭稱
尊號遂僭國號大越羅平改元順天僞命鏐爲兩浙都將

鏐不受命以聞昭宗命討昌乾寧四年鏐率浙西將士破越州擒昌以獻朝廷嘉其功賜鏐鐵券又除宰臣王溥爲威勝軍節度使而兩浙士庶拜章請以鏐兼杭越二鎮朝廷不能制因而授之改威勝軍爲鎮東鏐乃兼鎮海鎮東兩藩節制鏐旣兼兩鎮精兵三萬而楊行密連歲興戎攻蘇湖潤節州欲兼并兩浙累爲鏐所敗然亦爲行密侵盜數州而鏐所部止十三州而已天復二年鏐大將許再思徐綰叛引宣州節度使田頵謀襲杭州田頵等率師掩至城下鏐激軍士一戰敗之生擒徐綰田頵遁走天祐元年夏四月封鏐吳王秋八月昭宗崩昭宣帝卽位遣使來宣

告鏐素服舉哀於軍門天祐二年冬十一月鏐建功臣堂立碑紀功列賓佐將校名氏於碑陰者五百人天祐三年九月昭宣帝遣使授鏐吳王竹冊是歲割睦州分水縣南新登五鄉隸杭州臨安縣天祐四年春三月勅升衣錦城爲安國衣錦軍夏四月朱全忠篡位僞號梁改元開平五月進封鏐爲吳越王客有勸鏐拒梁命者鏐笑曰我豈失爲孫仲謀邪遂受之鎮海節度判官羅隱亦勸鏐舉兵討梁鏐心義之而不從秋八月梁加鏐兼淮南節度使天祐五年春正月梁勅改臨安縣爲安國縣廣義鄉爲衣錦鄉夏六月梁加鏐守中書令是歲鏐以中原喪亂改元天寶

私行於境中既而復通中國或諱而不稱天祐六年夏四月梁加鏐守中書令淮南兵圍蘇州鏐遣其弟鋸鏢救之內外夾攻遂大敗之天祐七年吳越天寶三年秋八月始築捍海石塘塘外植混柱十餘行以折水勢先是江濤洶湧版築不時就鏐於曇雪樓架强弩五百以射潮潮爲頓斂冬十月鏐遊衣錦軍作還鄉歌曰三節還鄉兮掛錦衣碧天朗朗兮愛日暉功臣道上兮列旌旗父老遠來兮相追隨家山鄉眷兮會時稀今朝設宴兮觥散飛斗牛無孛兮民無欺吳越一王兮駟馬歸天祐八年夏四月梁加鏐守尚書令兼淮南宣歙等道四面行營都統建生祠於衣

錦軍天祐九年春二月梁朱友珪弑父篡位遣使宣諭授鏐尚父冊禮天祐十年梁朱友貞誅友珪自立遣使宣諭授鏐尚父冊禮天祐十二年秋七月梁加鏐諸道兵馬元帥天祐十四年冬十日梁加鏐天下兵馬都元帥天祐十五年春二月鏐開府置官屬冬十一月楊隆演取虔州鏐始由海道入貢京師天祐十八年夏五月梁改元龍德賜鏐詔書不名莊宗同光元年夏四月滅梁遣宣諭使日淮甸至賜鏐名馬玉帶香匣同光二年吳越寶大元年秋九月鏐遣使錢詢入貢求玉冊莊宗下其議於有司羣臣皆以謂非天子不得用玉冊郭崇韜尤爲不可旣而許之乃

續唐書卷二十九
五
賜鏐玉冊金印冬十月勅授鏐天下兵馬都元帥尙父尙書令吳越國王授鏐子元瓘兩浙節度使同光三年秋八月鏐起玉冊金券詔書二樓於衣錦軍遣使冊新羅渤海王海中諸國皆封拜其君長同光四年夏四月莊宗崩明宗卽位改元天成吳越改元寶正天成四年秋八月唐賜烏昭遇自盡時朝廷安重誨用事鏐致書重誨辭甚倨嫚重誨大怒是時供奉官烏昭遇韓玫使吳越旣還玫誣昭遇稱臣舞蹈遂有是命重誨乃誣奏鏐大不敬九月癸巳詔削鏐王爵元帥尙父以太師致仕長興元年冬十月鏐附表引咎元瓘等復遣人以絹表自陳長興二年春二月

安重誨伏誅明宗復鏐官爵國王如故依前不名長興三年吳越寶正七年春二月庚戌鏐薨年八十一謚武肅子元瓘立

元瓘字明寶初名傳瓘卽位更今名鏐之第五子也少爲質於田頽頽叛於吳吳會吳越兵攻之頽每敗歸卽欲殺元瓘頽母嘗蔽護之後頽將出語左右曰今日不勝必斬錢郎是日頽戰死元瓘得歸鏐臥病召諸將告曰吾子皆愚懦不足任後事吾死公等自擇之諸將皆泣曰大令公從征多有功諸子莫及請立之鏐乃出管鑰數篋召元瓘與之曰諸將許爾矣遂襲位以遺命仍遵中朝年號稱長

與二年除民田荒絕者租稅長興四年春二月明宗起復元瓘官爵冬十一月明宗崩閔帝立應順元年夏四月閔帝崩末帝立清泰元年春正月冊元瓘爲吳越王清泰三年末帝遣使賫吳越國王金印賜元瓘歸舊物也冬十一月契丹立石敬瑭爲帝僞號晉改元天福十二月晉授元瓘天下兵馬副元帥烈祖昇元四年僞晉天福六年秋七月甲戌元瓘有疾府署災焚之一空乃移他所火輒隨發遂驚悸發狂八月辛亥薨年五十五謚日文穆子佐立佐字元祐元瓘第六子也卽位時年十四問倉庫吏今蓄積幾何對曰十年佐曰然則軍食足矣可以寬吾民乃令

復其境內稅二年保大元年僞晉天福八年冬十月晉遣使授佐吳越國王玉冊前代玉冊冊夷王有之僞梁時欲厚於鏐首爲式例故因而不改保大二年秋七月石重貴僞改元開運保大四年僞開運二年晉授佐東南面兵馬都元帥冬十一月閩大亂李達乞師於吳越乃召諸將計事皆不欲行佐奮然曰吾爲元帥而不能恤鄰將安用之諸將皆素蓄養獨不肯以身先我乎有異議者斬乃遣統軍使張筠趙承泰等率兵二萬水陸赴之以救閩由是諸將皆服佐立七年溫恭禮士躬勤政務因民獻嘉禾而賜復二年襲封吳越國王玉冊金印皆如元瓘保大五年春

續唐書卷二十九
正月契丹人東京廢石重貴爲負義侯二月辛未晉劉知遠僭稱帝於河東仍稱天福十三年夏六月乙卯佐薨年二十謚忠獻弟侗立

侗字隆道元瓘第七子也未帝時常以佐性寬善而掌兵權者難制及代佐爲帥以禮法繩下宿將舊勳不甚優禮大將胡進思殊不自安乃謀於親軍去侗冬十二月進思率甲士三百大譟突入衙署侗闔戶拒之左右與之格鬪盡爲進思所殺遂遷侗於別館幽於衣錦軍越二十年始薨謚曰忠遜是時進思帥諸將迎侗異母弟俶立

俶字文德元瓘第九子也保大六年春正月丙寅漢劉知

遠殂子承祐襲僞位改元乾佑夏四月胡進思疽發背死吳越人快之保大七年僞乾祐二年漢授俶兵馬都元帥吳越國王仍賜玉冊金印保大八年春二月甲申元宗遣劔州刺史陳誨攻福州執吳越守將馬光進等庚寅永安軍留後查文徽至福州知威武軍吳程等令閩人詐降遂生擒文徽及行軍判官楊文憲等二十餘人於城下斬馘萬計陳誨等敗走秋七月勅歸馬光進等以易查文徽冬十月俶遣文誨歸金陵是年漢郭威弒承祐而篡立僞號周改元廣順保大十年僞廣順二年周授俶天下兵馬都元帥保大十一年郭威殂養子柴榮襲僞位改元顯德保

續唐書卷二十九
大十五年僞顯德四年秋八月周遣諫議大夫尹日就吏部郎中崔頌等使於吳越且諭之曰此行決平江北卿等還當陸來也交泰二年僞顯德六年夏六月柴榮殂子宗訓襲僞位交泰三年春正月癸巳宋祖稱帝改元建隆元年遣使諭俶三月丙辰俶遣使貢御服金帛賀宋卽位夏四月宋授俶天下兵馬大元帥建隆二年元宗崩後主立開寶二年俶貢祕色窰於宋開寶四年後主貶國號稱江南後主十四年宋開寶七年冬十二月癸亥俶兵攻常州後主遺俶書曰今日無我明日豈有君一旦明天于易地賞功王亦大梁一布衣耳俶覽書投地表其書於宋開寶

九年春二月戊午俶朝於宋冬十月癸丑宋祖崩晉王光義卽位改太平興國元年十一月俶遣子惟渲貢物詣宋稱賀太平興國三年詔俶入朝俶舉族歸於京師國除俶自奉甚儉素好書善吟咏性謙和未嘗忤物其爲政也募民能墾荒田者勿收其稅由是境內無棄田或請糾民遺田丁以增賦卽杖之國門國人大悅端拱元年秋八月俶薨追封秦國王謚忠懿

述曰錢氏自乾寧二年爲鎮海鎮東軍節度使兼有兩浙至納土於宋凡八十四年當時建國承家者未有若斯之久也乃自唐以來士民愛戴萬口同然非有刑驅勢迫之

續唐書卷二十九
九
蓋遺澤在人故沒世不能忘耳舊史僅美其事大勤王之節與荆楚湖湘不侔特其一端新修史記至謂其剝民而民不堪命非厚誣乎

續唐書卷二十九終

續唐書卷三十

海昌陳鱣謨

武林姜安
長水祝恂 全校

閩世家第九

王審知字信通光州固始人也父恁世爲農兄潮爲縣佐史廣明元年黃巢犯闕羣盜蜂起壽州屠者王緒自稱將軍攻固始聞潮與弟審邽審知有材勇號三龍召至以潮爲軍政時蔡州秦宗權方募士以益兵乃以緒爲光州刺史召其兵會擊巢緒遲留不行宗權發兵攻之緒率衆南奔所至剽掠自南康至閩入臨汀陷漳浦緒性猜忌部將有才者多殺之潮頗懼乃與豪首數輩共殺緒羣推潮爲

續唐書卷三十一
主時泉州刺史廖彥若爲政貪暴軍民苦之聞潮治軍有法耆老相率迎潮留爲州將潮卽引兵攻彥若逾年克之光啓元年福建觀察使陳巖表潮爲泉州刺史大順二年巖卒其壻范暉自稱留後潮遣審知將兵攻之踰年城中食盡乃斬暉而降中是盡有閩嶺五州之地景福二年秋九月戊戌昭宗以潮爲福建觀察使審知爲副使審知長七尺六寸隆準方口常乘白馬軍中號白馬三郎乾寧四年冬十二月丁未潮卒審知以位讓其兄審邽審邽以審知有功不受於是審知自稱留後表於朝光化元年春三月己丑以審知充威武軍留後冬十月授本軍節度使累

遷同中書門下平章事天祐元年夏四月加檢校太保封瑯邪王天祐六年僞梁開平三年夏五月進封閩王是時楊氏據江淮審知每歲朝貢汎海至登萊抵岸漂溺常十三四同光元年夏四月己巳莊宗卽皇帝位時審知鑄大鐵錢文曰開元通寶以五百文爲貫同光二年春二月遣使八貢於朝制加功臣進爵邑審知雖起隴畝至富貴而儉約好禮下士王淡楊沂徐寅之徒皆依之又建學四門以教閩士之秀者三十年間省刑薄斂一境晏然同光三年冬十二月辛未薨年六十四謚忠懿葬福州鳳池山子延翰立

延翰字子逸審知長子也爲人長大美皙如玉好讀書通經史同光四年春三月辛酉授威武軍節度使已而莊宗崩明宗立改元天成夏五月甲戌加同平章事延翰乃取司馬遷史記閩越王無諸傳示諸將吏曰閩越古王國也吾今不王何待之有於是軍府將吏上書勸進冬十月己丑建國稱王而猶稟唐正朔然驕淫奢侈跨城西湖築室號水晶宮每攜後庭游宴從子城複道以出襲位逾月卽出弟延鈞爲益州刺史又建州刺史延稟本姓周審知養子與延翰不協二人因謀作亂十二月延稟以兵入執延翰殺之延鈞立更名鱗

鱗審知次子也天成二年夏五月癸丑明宗授鱗節度使守中書令封瑯邪王天成三年秋七月進封閩王初延稟之弑延翰也次日鱗兵始至延稟自以養子推鱗立之延稟還建州鱗餞於郊延稟臨訣曰善繼先志毋煩老兄再來鱗銜之長興二年夏四月延稟率兵攻鱗擊西門率其子繼雄攻東門鱗遣王仁達拒之仁達伏甲舟中僞立白幟請降繼雄登舟伏兵發斬之梟其首并執延稟鱗誚之曰果煩老兄再下延稟不能對遂殺之六月作寶皇宮以道士陳守元爲官主冬十二月守元稱寶皇之語語鱗曰避位就道當爲天子六十年鱗欣然遜位命其子繼鵬權

主府事長興三年春三月甲辰復位鱗上表言楚王殷吳越王鏐皆爲尙書令今皆已薨請以授臣朝廷不報遂絕朝貢長興四年春正月黃龍見真封宅鱗卽皇帝位國號閩改元龍啓追尊父祖立五廟置百官以福州爲長樂府閩地狹小國用不足以中軍使薛文傑爲國計使多察民間陰事致富人以罪而籍歿其貲以佐用閩人皆怨清泰二年僞龍啓三年春正月丙申朔大赦改元永和立淑妃陳氏爲后二月設傾筐會於甘露堂夏六月以宮人春燕賜其子繼鵬冬十月鱗得風疾后與幸臣歸守明百官院使李可殷私通國人惡之莫敢言鱗次子繼韜與繼鵬久

相惡欲殺繼鵬繼鵬懼與皇城使李倣圖之己卯鱗疾甚倣使壯士持挺殺可殷於家庚辰疾少間后訴之帝詰可殷死狀倣懼而出與繼鵬率皇城衛士鼓譟入宮鱗聞變匿九龍帳中衛士刺之不殂宮人不忍其苦爲絕之倣并殺后及繼韜歸守明鱗立十年見殺謚曰惠子昶嗣

昶原名繼鵬鱗長子也旣卽位更今名清泰三年自稱知福建節度事遣使奉表入朝大赦境內改元通文以李倣判六軍諸衛事倣有弑君罪心常自疑昶患之因享軍伏甲執倣殺之梟其首倣部曲燒啓聖門奪倣首奔於錢唐昇元元年僞通文二年冬十月庚子烈祖遣使至閩告卽

位昇元二年僞通文三年春二月遣內客省使如金陵賀
卽位冬十一月晉以左散騎常侍盧損充冊禮使封昶爲
閩國王封其弟繼恭爲臨海郡王昶遣進奏官林恩白執
事以旣襲帝號辭冊命及使者昇元三年僞通文四年春
二月盧損至長樂府昶稱疾不見令弟繼恭主之又遣中
書舍人劉乙勞損於館損頗諂乙昶怒損還無所答繼恭
遣其佐鄭元弼隨損入貢三月命六宮設三昧宴以道士
譚紫霄爲正一先生夏四月巫者林興傳神言宗室將亂
乃命興率壯士殺叔父延武延望并其五子作三清殿於
內庭事無大小皆興傳寶皇命決之術者言宮中當有災
昶徙南宮爲長夜之飲秋七月乙巳北宮火焚宮殿殆盡
控鶴軍使連重遇控宸軍使朱文進數爲昶侮慢內懷不
平至是昶頗疑重遇縱火欲誅之內學士陳郊洩其言重
遇懼夜率衛士焚南宮昶挾愛姬子弟斬關而出宿於野
次重遇迎延義立之延義令其子繼業率兵襲昶及之射
殺數人昶知不免擲弓於地繼業執而殺之及其妻子皆
死謚昶曰康延義立

曦審知第二十八子也初名延義旣立更名昇元三年閏
七月壬午改通文爲永隆元年遣使奉表稱藩於晉然在
國置百官皆如天子之制昇元四年僞永隆二年春正月

曦與弟建州刺史延政有隙二月遣統軍使潘師達吳行
真將兵擊延政焚廬舍延政乞師於吳越吳越命將援建
州三月戊辰師達分兵出戰延政遣將林漢徹敗之丁丑
延政募敢死士入師達壘縱火城上殺師達衆大潰戊寅
復引兵攻行真寨乘勝取永平順昌二城丙戌遣使人聘
金陵夏四月吳越兵至建州延政以曦兵已解請班師不
從五月延政大破吳越兵於城下是月烈祖遣客省使尙
全恭諭曦與延政連和六月延政與曦盟於宜陵己而猜
恨如故冬十月曦因商人奉表於晉以自理十一月甲申
晉以曦爲威武軍節度使兼中書令封閩國王十二月遣

客省使葛裕如金陵賀仁壽節昇元四年僞永隆三年秋
七月曦自稱大閩王冬十月卽皇帝位延政自稱兵馬元
帥昇元五年僞永隆四年閏月遣尙食使林宏嗣入聘金
陵秋八月鑄永隆通寶大鐵錢一當鉛錢百冬十二月以
鹽鐵使李仁遇爲左僕射兼中書侍郎仁遇曦甥也以姿
色嬖之曦好爲牛飲荒淫無度鍛銀葉爲杯日之曰冬瓜
片又名醉如泥羣臣醉不勝以酒過被殺者無算是歲遣
徐績如金陵賀仁壽節昇元六年僞永隆五年春正月延
政稱帝改國號殷二月己卯烈祖崩閩遣使如金陵弔祭
保大二年僞永隆六年元宗降書責曦兄弟尋戈曦引周

續唐書卷三十一
公誅管蔡太宗誅建成元吉以復連重遇弒昶懼爲國人
所討與朱文進結婚自固曦心疑之常以語相誚重遇等
流涕自辨會李氏妬尙妃之寵欲圖曦而立其子亞澄乃
使人告重遇等曰主上殊不平於二公柰何重遇等懼三
月乙酉曦出遊醉歸重遇等遣壯士拉於馬上殺之謚曰
景葬福州

延政審知子也曦肆爲酷虐延政數遺書切諫曦怒舉兵
相攻遂成讎敵已而延政以建州開國稱殷改元天德自
置官屬保大三年僞天德二年春正月鑄天德重寶大鐵
錢一當百二月連重遇朱文進弒曦文進遂自立爲閩王

延政遣將討之不克冬十月泉州指揮使留從效執泉州
刺史黃紹頗斬之請王繼勳爲刺史漳州將陳謨殺刺史
程贊迎王繼成爲刺史汀州刺史許文進亦降於延政遂
得三州重遇亦殺文進福州將林仁翰又殺重遇保大四
年僞天德三年春正月臣民共迎延政都福州復國號閩
元宗聞閩亂發兵攻之延政遣從子繼昌守福州而大兵
方急攻延政福州將李仁達擒繼昌殺之欲自立懼衆不
附乃立雲峯寺僧卓儼明爲天子已而又殺儼明而自立
用保大年號送欵於朝元宗以仁達爲威武軍節度使更
其名曰宏義而大兵攻破建州遷延政之族於金陵以延

續唐書卷三十一
政爲羽林大將軍保大五年改延政安化節度使降封鄱陽王保大九年徙封光山王未幾薨贈福王謚恭懿述曰閩之發迹也以景福二年命王潮爲福建觀察使審知爲副使傳至延政以保大三年而降於唐計其始終實五十二年舊史及閩王列傳紀年通譜閩中實錄皆云六十年後人又強合騎馬來騎馬去之讖以爲六十一年俱屬無稽新修史記云五十五年亦未深攷耳

續唐書卷三十終

續唐書卷三十一

海昌陳鱣誤

武林姜安
長水祝恂 全校

南平世家第十

高季興字貽孫陝州硤石人也本名季昌避唐獻祖廟諱更名季興少爲汴州賈人李七老家僮朱全忠鎮宣武七郎以入貲得養爲子命友讓以子蓄之因冒姓朱補制勝軍使遷毅勇指揮使天復二年梁兵攻鳳翔李茂貞堅壁不出全忠議欲收軍還河中季興獨進曰天下豪傑窺此舉者一歲矣今岐人已僊破在早夕而大王之所慮者堅壁以老我師此可以誘致之也全忠壯其言募勇敢士得

騎士馬景季興授以計引見全忠景曰此行無還理願錄其後全忠惻然止之景固請乃行景以數騎馳叩城門告曰汴兵將東前鋒去矣岐人以為然開門出追汴軍汴軍隨景後以進殺其九千餘人景死之岐後與汴和昭宗出贈景官謚曰忠壯季興由是知名天復三年拜宋州團練使從破青州徙潁州防禦使復姓高氏天祐三年冬十月襄州趙匡凝破雷彥恭於荆南汴兵攻襄州彥恭復寇荆南時留後賀瓌殊怯乃以季興為荆南節度觀察留後天祐四年偽梁開平元年夏五月拜季興荆南節度使天祐五年偽開平二年加同中書門下平章事天祐七年偽開

平四年夏六月季興擊楚兵於油口斬首五千級逐北至白田而還天祐九年偽乾化二年朱全忠被弑季興見梁日衰潛有據荆南之志乃治城塹設樓櫓阻兵自固天祐十年偽乾化三年秋八月乙亥朱友貞封季興為渤海王賜以袞冕劍佩天祐二十年梁亡晉王即唐帝位改同光元年下詔慰諭季興司空勳等皆勸入朝梁震以為不可季興不聽以騎士三百為衛朝於洛陽莊宗果欲留之郭崇韜切諫乃止加季興守中書令厚禮而遣之莊宗嘗問季興曰吾已滅梁欲征吳蜀何者為先季興曰宜先蜀臣請以本道兵先進莊宗大悅以手拊其背季興因命工繡

其手迹於衣歸以爲榮耀季興已行莊宗心悔遣之密詔襄州劉訓圖之季興行至襄州心動夜斬關而出已出而詔書至季興歸謂梁震曰不聽子言幾不免因曰此行有二失來朝一失放還一失且主上百戰以取河南對功臣誇手鈔春秋又曰我於手指上得天下其自矜伐如此又荒於遊畋政事多廢吾可無慮矣同光二年春三月丙午加季興兼尙書令進封南平王季興謂梁震曰此恐吾與蜀連衡也同光三年秋九月以季興爲西川東南面行營招討使伐蜀仍詔取夔忠萬歸峽五州爲巡屬季興未出兵魏王繼岌已破蜀季興方食聞蜀亡遽失箸曰是老夫

之過也倒持太阿授人以柄奈何梁震曰不足憂也朝廷得蜀安知不爲我福同光四年春二月季興請夔忠萬州及雲安監隸本道莊宗許焉詔未下而莊宗崩明宗卽位改元天成夏六月甲寅季興表請夔忠萬歸峽五州爲屬郡廷臣以爲季興請自取之而兵出無功不與明宗不得已與之天成二年春二月季興旣轄夔忠等州復請勿除刺史自以子弟爲之明宗不許乃除別將西方鄴爲夔州刺史季興拒而不納初魏王繼岌遣押牙韓珙部送蜀珍寶金帛四十萬浮江而下季興殺珙等十餘人於峽口盡掠其貲重至是明宗大怒制削季興官爵乃以襄州劉訓

爲招討使攻之不克又命東川節度使董璋充東面招討使而以西方鄴副之克其夔忠萬三州天成三年夏六月辛巳季興以荆歸峽三州復稱藩於吳吳冊季興爲秦王冬十二月丙辰季興薨年七十一謚武信葬江陵子從誨立

從誨字遵聖季興長子也爲人明敏多權計入梁爲供奉官累遷鞍轡庫使告歸省季興遂留爲馬步軍都指揮使行軍司馬季興旣薨遂襲位吳以從誨爲荆南節度使從誨以父自絕於唐懼復見討乃遣使聘楚馬殷爲之請命於朝而從誨亦遣押牙劉知謙奉表自歸進贖罪銀三千

兩明宗納之長興元年春正月拜從誨節度使追封季興楚王謚武信二月封從誨渤海王應順元年春正月改封南平王清泰三年夏四月從誨遣使如吳奉牋勸烈祖卽帝位冬十一月契丹立石敬瑭爲帝僞號晉昇元元年冬十月烈祖稱帝遣使告卽位十一月從誨表請置邸金陵烈祖許之昇元二年春正月甲子從誨遣龐守規如金陵賀卽位昇元三年春二月烈祖復姓李復國號唐從誨使王崇嗣如金陵賀南郊昇元四年僞晉天福五年晉遣翰林學士陶穀爲從誨生辰國信使從誨宴於望沙大陳戰艦於樓下謂穀曰吳蜀不賓久矣願修武備習水戰以待

師期穀乃具道其語敬瑭大喜復遣使賜甲馬百匹昇元五年僞天福六年夏四月晉安從進反結從誨爲外援從誨外爲拒絕陰與之通晉使致討從誨遣將李端以舟師爲應昇元六年僞天福七年夏六月敬瑭殂子重貴立秋八月晉高行周陷襄州安從進舉族自焚從誨求郢州爲屬郡不許保大五年僞開運四年春正月契丹滅晉劉知遠起太原僞號漢從誨遣使人貢於契丹亦遣使間道詣太原奉表勸進且言漢得天下願乞郢州爲屬知遠陽諾之二月知遠僭位從誨遣使朝貢仍求郢州知遠不與從誨怒發兵攻郢州爲刺史尹實所敗乃絕漢附於唐蜀保

大六年僞乾祐元年漢遣國子祭酒田敏使於楚假道荆南從誨問敏中國虛實以爲契丹之後兵食皆殫意欲以誚敏敏爲杜重威悉以晉戈甲降契丹契丹置之鎮州未嘗以北而晉兵皆漢有也從誨不悅敏以印本五經遺從誨從誨謝曰余之所識不過孝經十八章爾敏曰至德要道於此足矣因誦諸侯章曰在上不驕高而不危制節謹度滿而不溢從誨以爲譏已卽以大卮罰敏荆南地狹兵弱介於吳楚爲小國自吳稱帝而南漢閩楚皆奉中原正朔歲時貢奉皆假道荆南季興從誨常邀留其使者掠取其物而諸道移書責誚或發兵加討卽復還之而無媿色

其後南漢與閩亦皆稱帝惟從誨所嚮稱臣利其賜予故諸國賤之皆目爲高賴子里俗語謂奪攘苟得無媿恥者爲賴子猶言無賴也冬十一月寢疾命子保融判內外兵馬事癸卯從誨薨年五十八謚文獻葬龍山鄉子保融立保融字德長從誨第三子也莫知其得立之因長興初以蔭補太子舍人賜緋累加至檢校保大十四年春正月郭威篡位僞國號周改元廣順周加保融兼中書令封渤海郡王保大十三年僞顯德元年春正月郭威殂養子柴榮嗣位周進封保融爲南平王保大十四年僞顯德三年春正月周師犯淮南保融遣使率兵三千出夏口以爲應又

遣客將劉扶奉牋於元宗勸附於周中興元年僞顯德五年春二月周師入犯至雄州夏五月元宗歸附於周柴榮得保融所與牋大喜賜絹百匹荆南自後唐以來數歲一貢京師而中間兩絕及僞顯德時無歲不貢又以器械金帛皆常產不足効誠乃遣弟保紳入朝益蒙嘉獎初季興之鎮梁以兵五千爲牙兵衣食皆給於梁至明宗時歲給以鹽萬三千石後不復給至是乃命泰州給之建隆元年春正月宋受禪保融懼一歲三入貢保融迂緩無能政事悉委弟保勗秋八月保融薨年四十一謚忠懿葬龍山弟保勗立

保勛字省躬從誨第十子也鍾愛尤甚季興在時或因事
盛怒惟保勛一見自解荆人目爲萬事休保融卒拜節度
使建隆二年遣弟保寅入貢保勛少多病頗有才至是淫
佚無度又好營造國政不理軍民咸怨從事孫光憲切諫
不聽未幾寢疾顧其將梁延嗣曰諸兄弟中孰可畀後事
延嗣曰繼冲長矣保勛領之建隆三年冬十一月保勛卒
年三十九贈侍中繼冲立

繼冲字咸和保融長子也保勛疾革命繼冲判內外兵馬
事保勛旣歿宋除繼冲荆南節度使會湖南周行逢卒子
保權立其將張文表作亂建隆四年春正月宋命慕容延

釗等討之假道荆南約以兵過城外繼冲親校李景威力
言城外之約不可信孫光憲叱之曰汝峽江一民爾安識
成敗且中國自周已有混一之勢況宋受命豈易當耶亟
勸繼冲去斥埃封府庫以待繼冲以爲然景威出而歎曰
吾言不用大事去矣因扼吭而死延釗兵至繼冲出逆於
郊而前鋒遽入其城繼冲亟歸見旌旗甲馬布列衢巷乃
以肩輿幕井上給內人入輿多墮井死遂詣延釗納牌印
盡籍其境內州府三縣一十七戶一十四萬三千三百遣
將奉表於宋宋復命繼冲爲節度使夏六月有事於南郊
繼冲上書願倍祠秋九月具文告三廟率其將吏宗族五

百餘人朝於京師授武寧軍節度使開寶六年繼冲卒年三十一贈侍中

述曰路振編九國志不列南平以南平止江陵一隅不予其爲國也後振孫綸作荆南志續之或稱十國志焉舊史入於世襲列傳新修史記列諸十世家劉恕十國紀年因之揆其始終實與岐相等而興滅年世較久故仍著爲世家焉

續唐書卷三十一終

續唐書卷三十一

海昌陳鱣撰

武林姜安長水祝恂全校

晉世家第十一

石敬瑭太原人也父臬捩雞本出於西夷自朱邪歸唐從朱邪入居陰山其後武皇起雲朔之間臬捩雞以善騎射從征有功官至洺州刺史臬捩雞生敬瑭其姓石不知其得姓之始也敬瑭爲人寡言笑明宗愛之妻以女是爲永安公主由是常隸帳下號左射軍天祐十三年春二月莊宗已得魏梁將劉鄩急攻清平莊宗馳救之未及陣爲鄩所掩敬瑭以十餘騎橫槊深入擊取以旋莊宗拊其背而

壯之手啗以酥啗酥夷俗所重由是知名天祐十五年冬十二月莊宗戰於胡柳前鋒周德威戰死敬瑭以左射軍復擊敗梁兵天祐十九年明宗戰胡盧套楊邨幾爲梁兵所扼敬瑭解之莊宗卽位改元同光歷數軍功明宗及敬瑭居最同光四年春二月趙在禮作亂明宗討之至魏而兵變明宗將自訴於天子敬瑭獻計不如速進夷門得之可以成事明宗然之與之驍騎三百渡黎陽爲前鋒明宗遂入汴莊宗自洛後至不得入而兵皆潰去莊宗西遷明宗以敬瑭爲前鋒趣汜水且收其散卒夏四月莊宗崩明宗入立改元天成授敬瑭保義軍節度使天成二年春二

月加檢校太保兼六軍諸衛副使冬十月明宗幸汴爲御營使尋爲宣武軍節度使天成三年夏四月徙鎮天雄五月丁未加駙馬都尉長興元年夏五月徙鎮河陽冬十一月丁亥加兼侍中河東節度使十二月明宗崩應順元年春正月閔帝卽位加中書令三月徙鎮成德清泰元年夏四月岐陽兵亂閔帝出奔遇敬瑭於道敬瑭殺帝從者百餘人幽帝於衛州而去末帝卽位疑敬瑭必反清泰三年夏五月徙鎮天平敬瑭果不受命末帝下詔削奪敬瑭官爵命張敬達等討之敬瑭求援於契丹秋九月契丹入自雁門與敬達等戰敬達等兵大敗敬瑭夜出北門見契丹

約爲父子冬十一月丁酉契丹冊敬瑭僭皇帝位國號晉以幽涿薊檀順瀛漠蔚朔雲應新媯儒武寰十六州入於契丹己亥大赦改元天福掌書記桑維翰爲翰林學士尙書禮部侍郎知樞密使事尋遷同中書門下平章事閏十一月丙寅翰林學士承旨戶部侍郎趙瑩爲門下侍郎辛巳末帝聚族與親將宋審虔等登元武樓縱火自焚而崩十二月乙酉追降末帝爲庶人昇元元年僞天福二年春正月封唐宗室子爲公及隋鄴公爲二王後以周介公備三恪夏四月丁亥赦囚蠲民租賦冬十月甲申烈祖卽皇帝位於金陵國號唐改元昇元十一月戊辰加吳越王元

瓘天下兵馬副元帥進封吳越國王昇元二年僞天福三年春二月丁丑禁民造銅器秋七月辛酉以皇業錢作受命寶八月戊寅以馮道劉昫爲契丹冊禮使己丑蠲水旱民稅辛丑歸伶官於契丹冬十月庚辰升汴州爲東京以洛陽爲西京雍州爲晉昌十一月辛亥升廣晉府爲鄴都壬戌除鑄錢令十二月丙子封子重貴爲鄭王昇元三年僞天福四年春三月丙辰頒調元麻夏四月甲辰廢樞密使秋七月丙辰復禁鑄錢九月癸未封李從益爲郟國公以奉唐後冬十一月乙亥立唐高祖太宗莊宗明宗閔帝廟於洛陽昇元四年僞天福五年春正月丁卯朔除民公

私債冬十一月丙子始用二舞昇元五年僞天福六年春正月戊寅封唐叔虞爲興安王臺駘爲昌寧公三月除民間一一年至四年稅冬十二月丙戌朔徙封重貴爲齊王昇元六年僞天福七年夏六月乙丑敬瑭薨年五十一嗣子重貴立

重貴敬瑭兄子也兄名敬儒爲莊宗騎將早卒敬瑭以其子重貴爲子敬瑭七子六皆先死而重睿幼故重貴得立重貴少善騎射敬瑭使博士王震教以禮記久之不能通大義謂震曰此非吾家事也敬瑭爲契丹所立謀以一子留守太原契丹使盡出諸子自擇之指重貴曰此眼大者

可也遂授爲北京留守知河東節度累封齊王僞天福七年夏六月乙丑敬瑭薨重貴立庚午使左驍衛將軍石德超以御馬二撲祭相州西山夷禮也遣李仁廓如契丹契丹亦遣使來己卯宋崇節梁言使於契丹丁酉使石德超撲馬於相州西山庚子大赦冬十二月庚午北京留守劉知遠進百頭穹廬夷所用也保大元年僞天福八年春二月烈祖崩元宗立改元保大夏五月丁亥追封皇伯敬儒爲宋王六月辛未括借民粟殺藏粟者冬十月庚午括借民粟保大二年僞開運元年春正月甲戌朔契丹寇滄州己卯陷貝州庚辰契丹入雁門寇代州辛巳殿直王班使

於契丹至鄴都不得進而還乙酉北征丙戌契丹寇黎陽
辛卯講武於澶州契丹屯於元城趙延壽寇南樂甲午劉
知遠爲幽州道行營招討使括馬丙申契丹寇黎陽辛丑
劉知遠及契丹戰於秀容敗之博州刺史周儒叛降於契
丹二月戊申前都虞侯李守貞及契丹戰於馬家渡敗之
癸丑北面行營都虞侯馬全節及契丹戰於北平敗之三
月癸酉及契丹戰於戚城契丹去己丑冀州刺史白從暉
及契丹戰於衡水敗之癸巳籍民爲武定軍夏四月契丹
陷德州沿河巡檢使梁進敗之取德州甲寅至自澶州己
未馬全節及契丹戰於定豐敗之辛酉率借民財夏六月

克淄州秋七月辛未朔大赦改元開運九月丙子契丹寇
遂城樂壽代州刺史白文珂及契丹戰於七里烽敗之冬
十二月丁巳楊承勳囚其父光遠以降殺之閏月乙酉赦
青州契丹寇恆州保大三年僞開運二年春正月契丹陷
秦州壬子馬全節及契丹戰於榆林兩軍皆潰戊午如南
莊張從恩留守東都乙丑北征契丹去二月己巳幸黎陽
橫海軍節度使田武爲東北面行營都部署以備契丹三
月戊戌契丹陷祁州刺史沈斌死之丁未畋于戚城庚戌
馬全節克秦州辛亥易州戍將孫方諫及契丹戰於狼山
敗之甲寅杜威克滿城乙卯克遂城庚申杜威及契丹戰

於陽城敗之追奔至於衛邨又敗之夏四月戊寅勞旋於
戚城己卯勞旋於王莽河甲申至自澶州赦左右軍囚庚
寅大賞軍功五月丙申朔大赦丙午如南莊六月乙丑朔
御崇元殿百官入閣監修國史劉昫史官張昭遠等以新
修唐書紀志列傳并目錄凡二百三卷上之賜器帛有差
丁卯射於繁臺幸杜威第秋八月甲子朔廢二舞辛未閱
馬於茂澤陂丁丑括馬九月己亥閱馬於萬龍岡幸李守
貞第冬十月庚午遣使太子賓客羅周岳使副太子右庶
子王延濟冊兩浙節度使錢佐爲守太尉十二月乙丑以
兩浙節度使吳越國王錢佐兼東南面兵馬都元帥丁丑

臘畋于郊保大四年僞開運三年春正月癸巳朔命改鑄
天下合同印書詔印御前並以黃金爲之二月壬午如南
莊夏六月孫方諫以狼山叛附於契丹丙寅契丹寇邊秋
七月丙申兩浙節度使吳越國王錢佐加守太師北京留
守河東節度使北平王劉知遠加守太尉八月辛酉如南
莊召從臣宴樂至暮還宮九月辛丑行營馬軍排陣使張
彥澤及契丹戰於新興敗之癸卯劉知遠及契丹戰於朔
州敗之冬十一月永靜軍節度使梁漢璋及契丹戰於瀛
州敗績契丹寇鎮定十二月己未杜威軍於中渡壬戌奉
國都虞侯王清及契丹戰於滹沱敗績死之壬申杜威李

守貞張彥澤以其軍叛降於契丹張彥澤受契丹命率先
鋒二千人自封邱門斬關而入癸酉彥澤頓兵於明德門
外京城大擾大內都點檢康福全在寬仁門宿衛登樓覘
城彥澤呼而下之重貴奉表降於契丹自稱孫臣某甲戌
彥澤遷重貴及諸宮屬於開封府遣控鶴指揮使李榮將
兵監守殺開封尹桑維翰及宣徽使孟承誨丙戌晦百官
宿封禪寺明日百官列班遙辭重貴於寺以迎契丹重貴
舉族出封邱門契丹遂入大內至昏出宮是夜宿於赤欄
洛京留守景延廣扼吭而死契丹以重貴爲光祿大夫檢
校太尉封負義侯安置黃龍府遂滅晉

述曰敬瑭雞犬遺類豺狼野心依敵亂華弑君篡國舊史
謂其決鯨海以救焚何逃沒溺飲鳩漿而止渴終取喪亡
猶未盡其罪狀也逆嗣重貴奢淫驕縱閱馬調鷹任用非
人天怒民怨以至族行萬里身死窮荒自古得國之醜未
有若彼者而失國之醜亦未有若彼者以彼其醜欲從而
帝之何三晉之大臣不如鄒魯之僕妾哉

續唐書卷三十二終

續唐書卷三十三

海昌陳鱣誤

武林姜安
長水祝恂 全校

漢世家第十二

劉知遠太原人也其先沙陀部人父瑊事武皇為列校知遠面紫色目多白睛與石敬瑭俱事明宗為偏將明宗及梁人戰於德勝敬瑭馬甲斷知遠輟騎授之取斷革者自跨殿後而還敬瑭感之明宗踐阼敬瑭留守北京以知遠為押牙應順元年敬瑭鎮常山明宗召赴關會閔帝出奔與敬瑭遇於衛州止傳舍知遠遣勇士石敢袖鐵槌立敬瑭後及有變知遠擁敬瑭入室敢與左右格鬪而死知遠

率衆盡殺閔帝左右留敬瑭傳舍而去清泰元年末帝入立敬瑭復鎮河東已而有隙敬瑭舉兵知遠與桑維翰密贊成之敬瑭僭位太原以知遠爲侍衛親軍都虞侯領保義軍節度使契丹送敬瑭至上黨指知遠曰此都軍甚操刺無大故勿棄之昇元元年僞天福二年授侍衛馬步軍都指揮使領忠武軍節度使已而杜重威代領忠武知遠領歸德因恥與重威同制杜門不出敬瑭怒欲罷其兵職宰相趙瑩以爲不可乃遣端明殿學士和凝就第宣諭知遠乃受命昇元四年僞天福五年徙鄴都留守尋授河東節度使北京留守自知遠從敬瑭起太原有功勳位已高

及敬瑭薨重貴立與契丹絕盟用兵北方重貴疑知遠有異志每優尊之拜中書令封太原王幽州道行營招討使又拜北面行營都統保大三年僞開運二年四月封北平王尋加守太尉然知遠未嘗出兵契丹寇澶州別遣偉王攻雁門知遠敗之於秀容保大五年契丹入晉重貴北遷知遠遣牙將王峻奉表契丹耶律德光呼之爲兒賜以木拐一木拐虜之所貴如中國几杖非優大臣不得峻持拐歸虜人望之皆避道峻還爲知遠言契丹必不能成大事乃議建國二月戊辰河東行軍司馬張彥威等上牋勸進辛未知遠僭位稱天福十二年磁州賊帥梁暉取相州歸

附都將史宏肇取代州殺其刺史王暉晉州將藥可儔殺其守將駱從朗及括錢使諫議大夫趙熙歸附辛巳陝州留後王守恩歸附三月丙戌朔蠲河東雜稅延州軍亂逐其節度使周密壬辰丹州指揮使高彥詢以其州歸附壬寅契丹遜以其將蕭翰爲宣武軍節度使守汴州夏四月己未右都押衙楊邠爲樞密使蕃漢兵馬都孔目官郭威權樞密副使契丹陷相州殺梁暉乙丑侍衛親軍步軍都指揮使史宏肇取潞州戊辰奉國指揮使武行德以河陽歸附史宏肇取澤州丙子契丹耶律德光卒於欒城趙延壽於鎮州自稱權知國事五月甲午太原尹劉崇爲北京

留守丙申如東京蕭翰遜歸於契丹以郇國公李從益知南朝軍國事戊申次絳州刺史李從朗歸附六月丙辰次河陽殺李從益及其母甲子至自太原戊辰改僞國號漢赦罪人蠲民稅是月劉昫卒秋閏七月乙丑禁造契丹服器天雄軍節度使杜重威反天平軍節度使高行周爲鄴都行營都部署以討之八月壬午朔護聖指揮使白再榮逐契丹以鎮州來歸丙申安國軍節度使薛懷讓殺契丹將劉鐸入於邢州庚辰北征冬十月甲申次韋城赦河北十一月壬申杜重威降十二月癸巳至自鄴都保大六年僞乾祐元年春正月乙卯大赦改元己未知遠更名暈丁

丑薨年五十四葬睿陵子承祐立

承祐知遠第二子也姿貌白皙眉目疎朗知遠僭位授左衛上將軍大內都點檢兄承訓長而賢知遠愛之方屬以爲嗣而承訓卒知遠不豫悲哀疾劇乃以承祐屬諸將相宰相蘇逢吉日承祐未封王請亟封之未及封而知遠薨秘不發喪殺杜重威僞乾祐元年二月辛巳封承祐周王遂僭皇帝位壬辰右衛大將軍鳳翔巡檢使王景崇及蜀人戰於大散關敗之癸巳大赦三月丁丑李守貞反陷潼關夏四月辛巳陝州兵馬都監王玉克潼關壬午永興軍將趙思綰附於李守貞客省使王峻帥師屯於關西閏五

月國子監奏雕印板九經內有周禮儀禮公羊穀梁四經未有印板今欲集學官校勘四經文字鏤板從之秋七月癸亥契丹鄭州刺史王彥徽來奔乙亥王景崇叛附於李守貞八月壬午郭威討李守貞九月西面行營都虞侯尙宏遷及趙思綰戰敗績保大七年僞乾祐二年春正月乙巳朔赦囚二月丙子蠲民紉配租夏五月李守貞之將周光遜降乙丑趙思綰降秋七月丁巳郭威殺華州留後趙思綰於京兆甲子克河中八月郭從義殺前永興巡檢喬守溫丙戌郭威遣使獻俘冬十月庚午朔契丹寇趙魏羣臣進添都馬癸未監修國史蘇逢吉史官賈緯以所譔實

錄二十卷上之丙戌契丹陷內邱己丑郭威及宣徽南院使王峻伐契丹十一月契丹遜保大八年僞乾祐三年春正月西面行營都部署趙暉克鳳翔丙午郭威進添都馬壬申趙暉獻馘俘冬十一月丙子殺楊邠及史宏肇王章皆滅其族郭威反庚辰成義軍節度使宋廷渥叛附於威壬午威犯封邱泰寧軍節度使慕容彥超軍於七里店癸未勞軍於北郊甲申勞軍於劉子陂慕容彥超及郭威戰敗績開封尹侯益叛降於威乙酉承祐策馬至元化門遂與蘇逢吉郭允明詣西北邨舍允明知事不濟乃剗刃於承祐承祐薨年二十逢吉允明皆自殺其後郭威諡承祐

曰隱葬陽翟

旻初名崇知遠母弟也爲人美鬚髯重瞳少無賴嗜酒好博嘗黥爲卒知遠臣石敬瑭爲河東節度使署旻爲都指揮使知遠僭位以爲太原尹北京留守中書門下平章事承祐嗣位改河東節度使兼中書令承祐年少政在大臣郭威爲樞密使有功素與旻有隙旻與屬吏鄭珙謀乃罷上供征賦收豪傑籍民丁以自固保大八年僞乾祐三年郭威起兵承祐遇弒旻乃謀舉兵威反狀已白而承祐諸臣不卽推尊之故未敢卽立謬請立旻子贊爲嗣是時人皆知威非實意而旻獨喜曰吾兒爲帝矣何害乃罷兵遣

人至京師威少賤鯨其頸上爲飛雀世稱之爲郭雀兒至是見旻使者具道所以立贊之意因自指其頸曰自古豈有雕青天子幸公無以我爲疑旻益喜信以爲然太原少尹李驤勸其以兵下太行控孟津俟變旻大罵驤離間父子命牽出斬之并殺其妻以其事白於母后以明無他已而威果篡位降封贊湘陰公旻遣牙將李訾奉書於威求贊歸太原而贊不得歸旻始思自立保大九年僭帝位於晉陽仍稱乾祐四年所有者并汾忻代嵐憲隆沁遼麟石諸州之地以次子承鈞爲太原尹判官鄭珙趙華爲宰相都押衙陳光裕爲宣徽使遣通事舍人李訾行使於契丹

契丹與旻約爲父子之國旻乃遣宰相鄭珙致書稱姪皇帝以叔父事之而已契丹遣使冊命旻爲大漢神武皇帝又以自愛黃騮九龍十二稻玉帶報聘已而兀欲爲述軋所弑述律代立旻遣樞密使王得中聘於述律請兵攻周述律遣蕭禹厥率兵五萬助旻旻出陰地攻晉州爲王峻所敗德辰因取岢嵐州保大十二年僞乾祐七年春正月郭威薨養子柴榮立旻聞之喜遣使乞兵於契丹契丹遣楊衮將鐵馬萬騎及諸奚部兵五六萬人號稱十萬以助旻旻以張元徽爲先鋒自將騎兵三萬攻潞州與契丹兵南出團柏屯梁侯驛昭義軍節度使李筠遣將逆戰於太

平驛元徽斬其將穆令均筠遜歸上黨遂圍潞州時柴榮
新卽位以謂旻幸其有大喪必不能出兵宜自將以擊其
不意自宰相馮道等皆謂不可榮意甚銳遂行與旻遇於
高平楊衮望其師謂旻曰勁敵也未可輕動旻不聽王得
中叩馬諫又不聽趣元徽進兵會馬蹟爲榮兵所殺旻遂
大敗日暮收餘兵阻澗而守榮將劉詞繼至復乘勝追擊
旻又大敗旻間道馳去夜失道得邨兵民爲嚮導誤趨平
陽得他道以歸榮收軍潞州大宴軍士斬敗將七十餘人
軍威大振進攻太原遣符彥卿史彥超控忻口以斷契丹
援路大原方四十里榮兵去城三百步圍之匝月自四月

至六月攻之不克而彥卿爲契丹所敗彥超戰歿榮乃班
師旻自敗高平已而被圍憂憤成疾冬十一月薨年六十
子鈞立

鈞旻次子也初名承鈞少好學工書旻薨鈞謂服喪以日
易月非禮也始行三年之喪奉表契丹自稱男契丹答詔
呼爲兒遣使冊命嗣位其僭號仍稱乾祐不改元保大十
三年僞乾祐八年春二月庚申遣使如契丹請加上尊號
不許保大十四年僞乾祐九年冬改明年爲天會保大十
五年僞天會元年春正月乙丑朔大赦冬十一月契丹遣
高勳以兵助鈞鈞遣李存瓌與勳擊周至潞州而還保大

十六年僞天會二年柴榮北伐契丹下三關契丹使告於
鈞將發兵而榮班師乃已中興三年僞天會四年春正月
乙巳周禪位於宋宋改元建隆夏四月周昭義節度使李
筠起兵拒宋遣牙將劉繼沖判官孫孚奉表稱臣執其監
軍周光遜李廷玉送於太原乞兵爲援鈞欲謀於契丹繼
沖述筠意請無用契丹兵鈞卽率本國兵自將出團柏谷
羣臣餞於汾水僕射趙華獨言筠舉事輕易未可爲恃鈞
至太平驛封筠隴西郡王筠見鈞儀衛不備非如王者心
甚悔因自陳受郭氏恩不敢愛死而鈞與郭氏世仇聞其
言亦不悅遂使宣徽使盧贊監其軍筠心益不平與贊多

不協鈞遣宰相衛融和解之已而筠敗死融被執宋祖以
鐵搗擊融首不死釋之鈞懼引師歸僞天會七年秋七月
宋師侵邊冬十月丙申遣使告契丹以抱腹山人郭無爲
參議國政鈞自潞州之敗日懼宋師旣召無爲同平章事
復以五臺山僧繼顛署鴻臚卿十一月遣從子繼文如契
丹契丹拘之不遣先是旻凡舉事必稟契丹及鈞立禮文
多略契丹遣使責鈞改元援李筠殺段常不以告鈞惶恐
謝罪使者至契丹輒見留鈞奉之愈謹而契丹相待益薄
宋祖常因畷上諜者謂鈞曰君家與周世讎宜其不屈今
我與爾無所間何爲因此一方民若有志於中國宜下大

續唐書卷三十三
行以決勝負鈞遣謀者復命曰河東土地兵甲不足以當
中國之十一然鈞家世非叛者區區守此蓋懼漢氏之不
血食也宋祖哀其言笑謂謀者曰爲我語鈞開爾一路以
爲生故終其世不加兵僞天會十二年秋七月鈞以勢力
窘弱憂瘁得疾戊申遂薨年四十三謚曰孝和養子繼恩
立

繼恩本姓薛父釗爲卒旻以女妻之生繼恩知遠以釗婿
也除其軍籍置之門下釗無才能但衣食之而無用妻以
旻女常居中釗罕得見釗怏怏一日乘醉拔佩刀傷未死
釗卽自裁旻女後適何氏生子繼元而何及旻女皆卒旻

以鈞無子乃以二子命鈞養爲子鈞立以繼恩爲太原尹
鈞嘗語郭無爲繼恩非濟世才無爲不對鈞臥病召無爲
以後事付之鈞卒繼恩告哀於契丹而後立繼恩衰服視
事皆居勤政閣而鈞故執事百官宿衛者皆在太原府廨
九月己酉繼恩會諸臣飲酒旣罷臥閣中供奉官侯霸榮
率十餘人挺刃入閣閉戶而殺之無爲使人梯屋入殺侯
霸榮并其黨繼恩立裁六十餘日并人疑無爲授意於霸
榮亟殺之以滅口而左右卒莫能明無爲迎立繼元

繼元鈞養子也初授檢校司徒累遷金吾衛大將軍充大
內都點檢繼恩時進太師兼太原尹僞天會十二年冬十

一月既襲位仍稱天會不改元復修好於契丹天會十七年冬十二月將改元遣使稟命於契丹僞廣運元年春正月改元初宋師引汾水浸城并人大恐會城中有積草漂出塞之得無害郭無爲勸繼元出降繼元恃契丹爲援未之許也一日因宴羣臣無爲痛哭於庭曰柰何以空城抗百萬師乎蓋欲搖動并人而并人守意益堅太平興國四年夏五月宋師北征繼元窮窘而并人猶欲堅守前樞密副使馬峯入見流涕以興亡諭之五月癸未夜繼元乃遣客省使李勳奉表請降宋以繼元爲右衛上將軍封彭城公淳化中繼元薨

述曰後唐之廢也固由敬瑭之篡逆而知遠實左右之罪亦大矣及其乘虛竊據僭號登宸撫御無方于戈不息未及二年而身亡承祐稚弱無能又未及二年而身弑國亡何其速耶旻受郭威之欺固由長城自壞其得保一隅以圖存歷四傳而殄滅猶幸也夫

續唐書卷二十三終

續唐書卷三十四

海昌陳鱣撰

武林姜安
長水祝恂今校

周世家第十三

郭威字文仲邢州堯山人也本常氏子幼隨母適郭氏故
冒其姓父簡事石敬瑭爲順州刺史劉仁恭破順州簡見
殺威形神魁梧負氣好使酒潞州留後李繼韜募勇敢士
爲軍卒威時年十八以勇力應募莊宗滅梁繼韜伏誅麾
下牙兵悉隸從馬直威年二十一以通書算補爲軍吏好
讀聞外春秋略知兵法後爲侍衛軍吏劉知遠爲侍衛親
軍都虞侯尤親愛之臨鎮嘗以威從契丹滅晉知遠起兵

太原僭位拜威樞密副使保大六年僞乾祐元年春正月
知遠疾革以承祐託威承祐嗣位拜威樞密使河中李守
貞據城反承祐遣將討之久皆無功乃加威同中書門下
平章事使督諸將出戰威大破之守貞自焚死僞乾祐二
年秋八月威白河中班師承祐賜賚優厚旋議賜勳欲兼
方鎮威辭之乃止九月加威檢校太師兼侍中冬十月契
丹寇邊威以樞密使北伐至魏州契丹遜僞乾祐三年春
二月師還夏四月授威鄴都留守天雄軍節度使仍以樞
密使行詔河北諸州皆聽威節度承祐與李業等謀已殺
史宏肇又使李宏義殺王殷又使郭崇殺威及王峻於魏

詔書先至澶州宏義恐事不果反以詔書示殷殷與宏義
遣人告威而詔殺威峻使者亦止威匿詔書召院吏魏仁
浦謀之仁浦勸威反教其倒用留守印更爲詔令威誅諸
將校以激怒之將校皆憤然効用十一月丁丑威遂舉兵
渡河承祐遣開封尹侯益等率兵拒威又遣內養鷲脫覘
威所向鷲脫爲威所得乃附脫奏請縛李業等送軍中承
祐得威奏以示業等業等皆言威反狀已白乃悉誅威家
屬於京師庚辰威至滑州宋延渥叛降壬午犯封邱甲申
及慕容彥超戰於劉子陂彥超敗績奔於兗州承祐遇弒
於趙邨丙戌威入京師縱火大掠率百官朝承祐母后請

立嗣君庚寅威立泰寧軍節度使贊爲嗣辛卯請母后臨朝聽政十二月甲戌朔威北伐契丹軍於滑州癸丑至澶州而旋王峻遣郭崇以騎兵七百逆贊於宋州殺之庚申母后制以威監國保大九年僞廣順元年春正月丁卯威篡帝位大赦改元僞國號周戊寅劉旻自立於太原二月丁巳尙書左丞田敏使於契丹三月甲戌武寧軍節度使王彥超克徐州冬十月丙午劉旻起兵討威攻自晉州十一月王峻及王彥超拒之十二月慕容彥超反保大十年僞廣順二年春二月庚寅府州防禦使折德遠克岢嵐軍癸亥至曹州赦流罪以下囚乙亥克兗州壬午赦兗州夏

六月乙酉朔詣曲阜祀孔子庚子至自兗州秋九月乙丑契丹寇邊保大十一年僞廣順三年春二月甲申封柴榮爲晉王夏六月尙書左丞兼判國子監事田敏進印版九經五經文字九經字樣各二部保大十二年僞顯德元年春正月大赦改元壬辰威薨年五十一遺令薄葬葬嵩陵養子榮立

榮威之養子也本姓柴邢州龍岡人柴氏女適威榮幼從姑長威家威愛其謹厚遂以爲子榮善騎射略通書史黃老威爲漢樞密使榮爲左監門衛將軍威篡位累拜節度使檢校太傅同平章事授開封尹封晉王僞顯德元年春

正月壬辰威薨秘不發喪丙申發喪榮卽位仍稱顯德不
改元三月辛巳大赦癸未鄭仁誨留守東京乙酉如潞州
以攻漢癸巳及劉旻戰於高原敗之追及於高平又敗之
夏四月乙卯汾州防禦使董希顏遼州刺史張漢超俱叛
附辛酉取嵐憲州壬戌取石沁州庚午赦潞州流罪以下
囚忻州監軍李勅殺其刺史趙皋叛附五月丙子代州守
將鄭處謙叛附契丹救漢丁酉符彥卿及契丹戰於忻口
敗績先鋒都指揮使史彥超死之保大十三年僞顯德二
年春二月求直言甲戌大毀佛寺禁民親無侍養而爲僧
尼及私自度者秋九月丙寅朔頒銅禁閏月癸丑向訓克
秦州冬十月辛未取成州十一月乙未朔李穀爲淮南道
行營都部署以犯金陵戊申王景克鳳州保大十四年僞
顯德三年春正月庚子向訓守東京壬寅出師南侵辛亥
侍衛親軍都指揮使李重進犯金陵及唐兵戰於正陽敗
之壬申克滁州甲戌朝廷遣使議行成不荅壬午朝廷使
鍾謨下表丙戌取揚州辛卯取泰州三月取光舒常州夏
四月常泰州復入於唐五月乙卯至自淮南赦囚秋七月
光舒滁州復入於唐八月乙丑勸民種木及韭冬十一月
庚寅廢諸祠不在祀典者乙酉殺唐臣孫晟保大十五年
僞顯德四年春正月乙丑朔赦非死罪囚二月甲戌樞密

副使王朴守東京乙亥出師南侵三月丁未克壽州夏四月己巳至自壽州冬十月己巳王朴留守東京壬申出師南侵十二月乙卯泗州守將范再遇叛降庚申濠州團練使郭廷謂叛降丁丑取泰州中興元年僞顯德五年春正月丁亥取海州壬辰取靜海軍丁未克楚州守將張彥卿鄭昭業死之二月甲寅取揚州丁卯如揚州癸酉如瓜州三月壬午朔如泰州丁酉復如揚州辛卯如迎鑾鎮己亥克淮南十有四州以江爲界秋七月丁亥頒均田圖冬十月丁酉括民租十一月庚戌作通禮正樂十二月丙戌罷州縣課戶俸戶交泰二年僞顯德六年春三月甲戌北征榮薨年三十九葬慶陵子宗訓立

夏四月壬寅取乾寧軍辛丑取益津關以爲霸州癸卯取瓦橋以爲雄州取淤口關置寨五月乙巳朔取瀛州甲戌至自雄州六月癸未封子宗訓爲梁王宗誼燕國公癸巳宗訓榮第四子也榮卽位時羣臣請封子爲王榮謙抑久之及北取三關遇疾而還始封宗訓梁王僞顯德六年夏六月癸巳榮薨甲午宗訓卽位不改元秋八月庚寅封弟熙讓爲晉王熙謹紀王熙誨斬王壬寅高麗遣使朝貢并進別序孝經一卷孝經雌圖一卷越王孝經新義八卷皇靈孝經一卷九月丙寅左驍衛大將軍戴交使於高麗十

續唐書卷三十四
一月壬寅高麗遣使來交泰三年僞顯德七年春正月辛
丑朔契丹入寇河東癸卯宋祖率兵北征夜宿陳橋驛未
署軍變將士大譟呼萬歲擐甲將刃推戴宋祖卽大位扶
策升馬擁迫南行是日宋祖遂下詔詣崇元殿受命封宗
訓爲鄭王奉周祀開寶六年春宗訓薨於房陵年十八歲
謚曰恭葬順陵

述曰知遠之臨終也本以承祐託威而威則陰據其位墳
土未乾藐孤安在哉榮起自賤微頗知政事崇儒學闢異
端可謂令主獨恨其專犯南朝自忘後患天降之咎不永
其年暫傳幼子而國隨亡誠不足惜況當時北漢尙存與

周犄角不帝漢何帝周耶

續唐書卷三十四終

續唐書卷三十五

海昌陳鱣謨

武林姜安
長水祝恂全校

后妃傳第一

武皇帝貞簡皇后曹氏莊宗之母也太原人以良家子嬪於武皇姿質閒麗性謙退而明辨雅為秦國夫人所重從容謂武皇曰妾觀曹姬非常婦人王其厚待之武皇多內寵乾寧初平燕薊得李匡儔妻張氏有姿色嬖幸之姬侍罕得進御惟太后恩顧不衰武皇性嚴急左右有過必峻於譴罰無敢言者惟太后救諫即為解顏及莊宗載誕體貌奇武皇異而憐之太后益寵貴諸夫人咸出其下太后

亦恭勤內助左右稱之武皇薨莊宗嗣晉王位時李克寧
李存顯謀變人情危懼太后召監軍張承業指莊宗謂之
曰先人把臂授公此兒如聞外謀欲孤付託公等但置子
母子有地毋令乞養於沛幸矣承業因誅克寧存顯以清
內難莊宗善音律喜伶人謔浪太后常提耳誨之天祐七
年鎮定求援莊宗促命治兵太后曰子齒漸衰兒但不墜
先人之業爲幸矣何事櫛風沐雨離我晨昏莊宗曰稟先
王之命須滅仇讎山東之事機不可失及發太后餞於汾
橋悲不自勝莊宗平定趙魏駐於鄴城每一歲之內馳駕
歸寧數四人服其仁孝太后初封晉國夫人莊宗卽位命

宰臣盧損奉冊上書上皇太后尊號其年平定河南西幸
洛陽令皇弟存渥皇子繼岌就太原迎奉莊宗親至懷州
迎歸長壽宮太后素與劉太妃善分訣之後悒然不樂俄
聞太妃寢疾尙醫中使問訊結轍旣而謂莊宗曰吾與太
妃恩如伯仲彼經年抱疾但見吾面差慰中心吾暫至晉
陽旬朔與之俱來莊宗曰時方暑毒山路崎嶇無煩往復
可令存渥輩迎侍太妃乃止及凶問至太后痛哭累旬由
是不豫尋崩於長壽宮同光三年冬十月上謚曰貞簡皇
太后葬於壽安陵

莊宗神閔敬皇后劉氏魏州成安人也莊宗正室曰衛國

夫人韓氏其次燕國夫人伊氏后又其次也初封魏國夫人后家世寒微父劉突黃鬚善醫卜自號劉山人后生五六歲武皇攻魏州取成安裨將袁建豐得后納之晉陽官貞簡太后教以笙及歌舞及笄姿色絕衆聲伎擅長莊宗見而悅之莊宗已爲晉王太后幸其宮置酒爲壽自起歌舞太后歡甚命劉氏吹笙佐酒酒罷去留劉氏以賜莊宗先是莊宗攻梁軍於夾城得符道昭妻侯氏寵專諸宮官中謂之夾寨夫人莊宗出兵四方常以侯氏從軍其後劉氏生子繼岌莊宗以爲類己愛之由是劉氏寵益專自下魏博戰河上十餘年獨以劉氏從劉氏多智善迎意承旨

其他嬪御莫得進見其父聞劉氏已貴詣魏宮上謁莊宗召袁建豐問之建豐曰臣始得劉氏於成安北鵑時有黃鬚丈人護之乃出劉突示建豐建豐曰是也然劉氏方與諸夫人爭寵以門望相高因大怒曰妾去鄉時略可記憶妾父不幸死於亂兵妾時環尸痛哭而去此田舍翁安得至此因命笞於宮門莊宗已卽皇帝位欲立劉氏爲皇后而韓夫人正室也伊夫人位次在劉氏上以故難其事而未發宰相豆盧革樞密使郭崇韜希旨上章言劉氏當立莊宗大悅同光二年四月乙卯皇帝御文明殿遣使冊劉氏爲皇后皇后受冊乘重翟車鹵簿鼓吹見於太廟韓夫

人等皆不平乃封韓氏爲淑妃伊氏爲德妃莊宗自滅梁後志意驕怠宦官伶人亂政后特用事於中自以出於微賤踰次得立以爲佛力又好聚斂分遣人爲商賈至於市肆之間薪芻果茹皆稱中官所賣四方貢獻必分爲二一以上天子一以入中官宮中貨賄山積惟寫佛書饋賂僧尼而莊宗由此佞佛有胡僧自干闥來莊宗率皇后及諸子迎拜之僧游五臺山遣中使供頓所至傾動城邑又有僧誠惠自言能降龍嘗過鎮州王鎔不爲之禮誠惠怒曰吾有毒龍五百當遣一龍揭片石常山之人皆魚鼈也會明年滹沱大水壞鎮州關城人皆以爲神莊宗及后率諸子諸妃拜之誠惠安坐不起由是士無貴賤皆拜之獨郭崇韜不拜也是時皇太后及皇后交通藩鎮太后稱誥令皇后稱敕命兩宮使者笏午於道許州節度使溫韜以后佞佛因請以私第爲佛寺爲后父薦福莊宗數幸郭崇韜元行欽等私第常與后俱其後幸張全義第酒酣命后拜全義爲養父全義日遣姬妾出入宮中問遺不絕莊宗有愛妾甚有色而生子后心患之莊宗燕居宮中元行欽侍側莊宗問曰爾新喪婦其復娶乎吾助爾聘后指愛姬請曰帝憐行欽何不賜之莊宗不得已佯諾之后趣行欽拜謝行欽再拜起顧愛姬肩輿已出宮矣莊宗不樂稱疾不

食者累日同光三年秋大水兩河之民流徙道路京師賦調不充六軍之士往往殍踣乃預借明年夏秋租稅百姓愁苦號泣於路莊宗方與后荒於畋游十二月己卯獵畋於白沙后率皇子後官畢從歷伊闕宿龕澗癸未乃還是時大雪軍士寒凍金槍衛兵萬騎所至責民供給壞什器撤廬舍而焚之縣吏畏恐亡竄山谷明年三月客星犯天庫有星流於天禧占星者言御前當有急兵宜散積粟以禳之宰相請出庫物以給軍莊宗許之后不肯曰吾夫婦得天下雖因武功蓋亦有天命旣在天人如我何宰相論於延英殿后於屏間耳屬之因取粧奩及皇幼子滿喜置帝前曰諸侯所貢給賜已盡官中所有惟此耳請鬻以給軍宰相惶恐而退及趙在禮作亂出兵討魏始出物以給軍軍士負而詬曰吾妻子已餓死得此何爲莊宗東幸汴州從駕兵二萬五千及至萬勝不得進而還軍士離散所失大半至罌子谷道路隘狹莊宗見從官執兵仗者皆以好言勞之曰適報魏王平蜀得蜀金銀五十萬當悉給爾等對曰陛下與之太晚得者亦不感恩莊宗泣下因顧內庫使張容哥索袍帶以賜之容哥對曰盡矣軍士叱容哥曰致吾君至此皆由爾輩因抽刀逐之左右救之而免容哥曰皇后惜物不以給軍而歸罪於我事若不測吾身

萬段矣乃投水而死郭從謙反莊宗中流矢傷甚臥絳霄
殿廊下渴欲得飲后令宦者進飧酪不自省視莊宗崩后
與李存渥等焚嘉慶殿擁百騎出師子門后於馬上以囊
盛金器寶帶欲於太原造寺爲尼在道因與存渥姦及至
太原乃削髮爲尼明宗入立遣人賜后死晉天福五年追
謚曰神閔敬皇后自唐末喪亂后妃之制不備至莊宗時
後宮之數尤多有昭容昭儀昭媛出使御正侍真懿才咸
一瑤芳懿德宜一等其餘名號不可勝記莊宗遇弒後宮
皆散走朱守殷入宮選得二十餘人號國夫人夏氏以嘗
幸於莊宗守殷不敢留明宗立悉放莊宗時宮人還其家

獨夏氏無所歸乃以河陽節度使夏魯奇同姓也因以歸
之後嫁契丹突厥李贊華贊華性酷毒喜殺人婢妾微過
常加剗灼夏氏懼求離婚乃削髮爲尼以卒而韓淑妃伊
德妃皆居於太原石敬瑭反時爲契丹所虜又有昭儀侯
氏封汧國夫人昭媛白氏封沂國夫人出使美宣鄧氏封
魏國夫人御正楚真張氏封涼國夫人司簿德美周氏封
宋國夫人侍真吳氏封延陵郡夫人懿才王氏封太原郡
夫人咸一韓氏封昌黎郡夫人瑤芳張氏封清河郡夫人
懿德王氏封瑯琊郡夫人宜一馬氏封扶風郡夫人並同
光二年十二月敕

明宗昭懿皇后夏氏生秦王從榮及閔帝同光初后以疾崩明宗卽位追封爲晉國夫人長興中明宗以秦宋二王位望旣隆因思從貴之義乃下制曰故晉國夫人夏氏素推仁德久睦宗親嘗思內助之方不見中興之義子當御極子並爲王有鵲巢之高無暈衣之貴貞魂永逝懿範常存攷本朝之文沿追封之制將慰懷於九族冀叶慶於四星宜追冊爲皇后兼定懿號旣而有司上謚曰昭懿和武顯皇后曹氏生晉國公主天成三年正月冊爲淑妃長興元年正月十四日冊爲皇后應順元年正月冊爲皇太后至清泰三年閏十二月隨末帝崩於後樓

宣憲皇后魏氏鎮州平山人也初適平山民王氏中和末明宗徇地山東留成平山得后以歸明宗爲裨將性闊達不能治生產曹后亦疏於畫略生計所資惟宣憲而已居數年而宣憲后卒葬於太原生子從珂是爲潞王明宗時從珂已封王乃追封魏氏爲魯國夫人末帝清泰二年二月中書門下奏臣聞漢昭帝承祚御歷奉尊謚於雲陽魏明帝繼體守文思外家於甄館而皆追從徽號耐饗廟庭克隆敬本之文式叶愛親之道又覽國史竊有見明皇帝母曰昭成皇后竇氏代宗皇后母曰章敬太后吳氏始嬪朱邸俄闕幽宮鴻圖旣屬於明君尊號咸追於聖母伏以

魯國夫人發祥沙麓貽慶河洲三后最賢周母允成於天
統四妃有子唐宮先啓於帝基仰惟當宁之情彌軫寒泉
之思久虛殷薦慮損皇猷臣等謹上尊謚曰宣憲皇太后
請依昭成皇太后故事擇日備禮冊命又臣等伏聞先太
后舊陵永附先祠則都下難崇別廟既追尊謚合初闕宮
按漢朝故事園寢不在王畿或就陵所便立寢祠今商量
上謚後權立同廟以申告獻配祀之禮請俟他年從之時
方議建陵寢而太原石敬瑭反乃於京師河東府東立寢
宮明宗時內職德妃王氏邠州餅家子也有美色號花兒
羞少賣梁故將劉鄩爲侍兒鄩卒王氏無所歸是時明宗
夏夫人已卒方求別室有言王氏子安重誨以告明宗而
納之王氏素得鄩金甚多悉以遺明宗左右及諸子婦人
人皆爲王氏稱譽明宗益愛之而夫人曹氏爲人簡質常
避事由是王氏專寵明宗卽位議立皇后而曹氏當立曹
氏謂王氏曰我素多病而性不耐煩妹當代我王氏曰后
帝匹也至尊之位誰敢干之乃立曹氏爲皇后王氏爲淑
妃妃事皇后亦甚謹每帝晨起盥櫛服御皆妃執事左右
及罷朝帝與皇后食妃侍食徹乃退未嘗稍懈皇后心亦
益愛之然宮中之事皆主於妃明宗病妃與宦者孟漢瓊
出納左右遂專用事殺安重誨秦王從榮皆與焉劉鄩諸

子皆以妃故封拜官爵閔帝卽位冊尊皇后爲皇太后妃爲皇太妃初明宗後宮有生子者命妃母之是爲許王從益從益乳母司衣王氏見明宗已老而秦王握兵心欲自託爲後計乃曰兒思秦王是時從益已四歲又數教從益自言求見秦王明宗遣乳媪將兒往來秦府遂與從榮私通從榮因使王氏伺察宮中動靜從榮已死司衣王氏以爲秦王實以兵衛天子而以反見誅出怨言閔帝聞之大怒賜司衣王氏死而事連太妃由是心不悅欲遷之至德官以太后素善妃懼傷其意而止然待之甚薄末帝入立嘗置酒妃院妃舉酒曰願辭皇帝爲比邱尼帝驚問其故

妃曰小兒處偶得命若大人不容則死之日何面見先帝因泣下末帝亦爲之悽然待之頗厚石敬瑭兵犯京師末帝聚族將自焚妃謂太后曰事急矣宜少回避以俟姑夫太后曰我家至此何忍獨生妹自勉之太后乃與帝俱焚死而妃與許王從益及其妹匿於鞠院乃免明宗時昭儀王氏封齊國夫人昭容葛氏封周國夫人昭媛劉氏封趙國夫人孫氏封楚國夫人御正張氏封曹國夫人司寶郭氏封魏國夫人司贊于氏封鄭國夫人尙服王氏封衛國夫人司記蔡氏封蔡國夫人司膳翟氏封滕國夫人司醞吳氏封莒國夫人婕妤高氏封勃海夫人美人沈氏封太

續唐書卷三十五
原郡夫人順御朱氏封吳郡夫人司飾聊氏封潁川郡夫人司衣劉氏封彭城郡夫人司藥孟氏封咸陽郡夫人梳篋張氏封清河郡夫人司服王氏封太原郡夫人櫛篋傅氏封潁川郡夫人知客張氏賜號尚書故江氏追封濟陽郡夫人以上皆長興三年九月勅其名號皆中書門下按六典內職仿而行之內人李氏封隴西縣君崔氏封清河縣君李氏封成紀縣君田氏封咸陽縣君白氏封南陽縣君並長興四年二月勅前代內職皆無封君之禮此一時之制

閔帝哀皇后孔氏父循橫海軍節度使循陰遣人結王德妃求納其女德妃請娶循女爲從厚妃帝許之庚寅皇子從厚納孔循女爲妃有賢行初封魯國夫人生四子及卽位立爲皇后未及冊命而難作閔帝出奔后病子幼皆不能從應順元年四月末帝入立后及四子俱見殺

末帝劉皇后應州渾元人也父茂威后性强戾末帝素憚之天成中封爲沛國夫人清泰初百官三上表請立中宮遂立爲皇后其弟延皓爲人素謹厚及貴而改節以后故用事白鳳翔牙校環歲之間歷樞密使出爲鄴都留守及延皓爲張令昭所逐執政請行朝典后力制之止從罷色而已寇兵入洛后與末帝俱就燔焉

述曰自古一代之興衰固繫於乾綱亦由於坤道觀夫貞簡太后明敏慈祥謙恭翼順洵無虧於懿範也哉劉后黷貨擅權致爲厲階所謂亂匪降自天生自婦人也至於明宗夏后魏后降年不永內政無聞若曹太后及劉后俱同末帝以崩完貞全節以視王淑妃之暫以身免忝顏受封終歸見殺蓋相去遠矣

續唐書卷三十五終

